

19/05/1997

Program Pandang Ke Timur perlu diubah

KUALA LUMPUR, Ahad - Duta Jepun ke Malaysia, Issei Nomura, berkata beberapa perubahan perlu dilakukan terhadap Dasar Pandang Ke Timur yang dilancarkan 15 tahun lalu oleh Perdana Menteri, Datuk Seri Dr Mahathir Mohamad, supaya ia mencapai matlamat yang telah ditetapkan.

Katanya, pengubahsuaian itu perlu untuk mencerminkan kemajuan yang sudah dicapai sejak 15 tahun lalu oleh kedua-dua negara dan juga bagi mencerminkan arah tujuan program itu pada masa akan datang.

Berucap pada majlis sambutan ulang tahun ke-15 Program Dasar Pandang Ke Timur, Nomura menggariskan empat perkara yang perlu dibuat penyesuaian terhadap program sedia ada.

Seramai 239 pelajar Malaysia yang sudah menjalani kursus lepasan ijazah di Jepun sejak 1996 akan diserapkan ke dalam program Dasar Pandang Ke Timur.

Satu konsortium beberapa universiti Jepun akan menjalankan kursus pengajian tahun pertama dan kedua di Kuala Lumpur dan menggalakkan pelajar Jepun melanjutkan pelajaran tahun pertama dan kedua mereka di Malaysia.

Kursus latihan perindustrian yang akan dijalankan perlu memenuhi keperluan industri Malaysia yang berubah seperti dalam sektor multimedia dan teknologi maklumat.

Pengajian peringkat diploma di kolej teknikal akan disokong dengan penubuhan Institut Teknik Jepun-Malaysia Pulau Pinang (JMTI) tahun depan.

Nomura berkata, dengan adanya pengubahsuaian kepada program itu, Jepun berharap dapat memberikan lebih sumbangan ke arah merealisasikan matlamat Wawasan 2020.

Dalam ucapannya, Nomura kesal dengan laporan yang menyebut Menteri Pembangunan Usahawan, Datuk Mustapa Mohamed, kecewa dengan sikap bekas peserta Dasar Pandang Ke Timur yang gagal membentuk diri menjadi usahawan berjaya walaupun setelah menimba ilmu di Jepun.

Beliau berkata, laporan itu memberi gambaran seolah-olah dasar itu gagal mencapai matlamat yang diharapkan dan ia adalah salah sama sekali.

Mengikut laporan itu, Mustapa dipetik sebagai berkata hanya 12 daripada 1,200 pelajar Malaysia yang dihantar ke Jepun di bawah program itu berjaya menjadi usahawan. - Bernama

(END)